

佛說觀普賢菩薩行法經

一名觀普賢觀經
一名出深功德經

短五

劉宋罽賓三藏法師 曇摩蜜多譯

如是我聞一時佛在毗舍離國大林精舍重
閣講堂告諸比丘却後三月我當般涅槃尊
者阿難即從座起整衣服叉手合掌繞佛三
匝短五為佛作禮胡跪合掌諦觀如來目不暫捨
長老摩訶迦葉彌勒菩薩摩訶薩亦從座起
合掌作禮瞻仰尊顏時三大士異口同音而
白佛言世尊如來滅後云何眾生起菩薩心
修行大乘方等經典正念思惟一實境界云

何不失無上菩提之心云何復當不斷煩惱
不離五欲得淨諸根滅除諸罪父母所生清
淨常眼不斷五欲而能得見諸障外事佛告
阿難諦聽諦聽善思念之如來昔於耆闍崛
山及餘住處已廣分別一實之道今於此處
為未來世諸眾生等欲行大乘無上法者欲
學普賢行者我今當說其憶念法若見普賢
及不見者除却罪數今為汝等當廣分別阿
難普賢菩薩乃生東方淨妙國土其國土相
雜華經中已廣分別我今於此略而解說阿

難若比丘比丘尼優婆塞優婆夷天龍八部一切衆生誦大乘經者修大乘行者發大乘意者樂見普賢菩薩色身者樂見多寶佛塔者樂見釋迦牟尼佛及分身諸佛者樂得六根清淨者當學是觀此觀功德除諸障礙見上妙色不入三昧但誦持故專心修習心心相次不離大乘一日至三七日得見普賢有重障者七七日然後得見復有重者一生得見復有重者二生得見復有重者三生得見如是種種業報不同是故異說普賢菩薩身

量無邊音聲無邊色像無邊欲來此國入自在神通促身令小閻浮提人三障重故以智慧力化乘白象其象六牙七支柱地其七支下生七蓮華其象色鮮白白中上者玻瓈雪山不得爲比象身長四百五十由旬高四百由旬於六牙端有六浴池一一池中生十四蓮華與池正等其華開敷如天樹王一一華上有一玉女顏色紅輝有過天女手中自然化五莖篴一一莖篴有五百樂器以爲眷屬有五百鳥鳬鴈鴛鴦皆是寶色生華葉間象

鼻有華其莖譬如赤真珠色其華金色含而未敷見是事已復更懺悔至心諦觀思惟大乘心不休廢見華即敷金色金光其蓮華臺是甄叔迦寶如梵摩尼以爲華鬘金剛寶珠以爲華鬘見有化佛坐蓮華臺衆多菩薩坐蓮華鬘化佛眉間亦出金光入象鼻中從象鼻出入象眼中從象眼出入象耳中從象耳出照象頂上化作金臺當象頭上有三化人一捉金輪一持摩尼珠一執金剛杵舉杵擬象象即能行脚不履地躡虛而遊離地七尺

地有印文於印文中千輻轂輞皆悉具足一輞間生一大蓮華此蓮華上生一化象亦有七支隨大象行舉足下足生七千象以爲眷屬隨從大象象鼻紅蓮華色上有化佛放眉間光其光金色如前入象鼻中從象鼻出入象眼中從象眼出還入象耳從象耳出至象頸上漸漸上至象背化成金鞍七寶校具於鞍四面有七寶柱衆寶校飾以成寶臺臺中有一七寶蓮華其蓮華鬘百寶共成其蓮華臺是大摩尼有一菩薩結加趺坐名曰普

經五

三

賢身白玉色五十種光光五十種色以爲項
光身諸毛孔流出金光其金光端無量化佛
諸化菩薩以爲眷屬安詳徐步雨大寶華至
行者前其象開口於象牙上諸池玉女鼓樂
絃歌其聲微妙讚歎大乘一實之道行者見
已歡喜敬禮復更讀誦甚深經典徧禮十方
無量諸佛禮多寶佛塔及釋迦牟尼并禮普
賢諸大菩薩發是誓願若我宿福應見普賢
願尊者徧吉示我色身作是願已晝夜六時
禮十方佛行懺悔法誦大乘經讀大乘經思

大乘義念大乘事恭敬供養持大乘者視一
切人猶如佛想於諸衆生如父母想作是念
已普賢菩薩即於眉間放大人相白毫光明
此光現時普賢菩薩身相端嚴如紫金山端
正微妙三十二相皆悉備有身諸毛孔放大
光明照其大象令作金色一切化象亦作金
色諸化菩薩亦作金色其金色光照于東方
無量世界皆同金色南西北方四維上下亦
復如是爾時十方一一方面有一菩薩乘六
牙白象王亦如普賢等無有異如是十方無

量無邊滿中化象普賢菩薩神通力故令持經者皆悉得見是時行者見諸菩薩身心歡喜爲其作禮白言大慈大悲愍念我故爲我說法說是語時諸菩薩等異口同音各說清淨大乘經法作諸偈頌讚歎行者是名始觀普賢菩薩最初境界爾時行者見是事已心念大乘晝夜不捨於睡眠中夢見普賢爲其說法如覺無異安慰其心而作是言汝所誦持忘失是句忘失是偈爾時行者聞普賢說深解義趣憶持不忘日日如是其心漸利普

賢菩薩教其憶念十方諸佛隨普賢教正心正意漸以心眼見東方佛身黃金色端嚴微妙見一佛已復見一佛如是漸漸徧見東方一切諸佛心想利故徧見十方一切諸佛見諸佛已心生歡喜而作是言因大乘故得見大士因大士力故得見諸佛雖見諸佛猶未了了閉目則見開目則失作是語已五體投地徧禮十方佛禮諸佛已胡跪合掌而作是言諸佛世尊十力無畏十八不共法大慈大悲三念處常在世間色中上色我有何罪而

不得見說是語已復更懺悔懺悔清淨已普
賢菩薩復更現前行住坐卧不離其側乃至
夢中常為說法此人覺已得法喜樂如是晝
夜經三七日然後方得旋陀羅尼得陀羅尼
故諸佛菩薩所說妙法憶持不失亦常夢見
過去七佛唯釋迦牟尼佛為其說法是諸世
尊各各稱讚大乘經典爾時行者復更懺悔
徧禮十方佛禮十方佛已普賢菩薩住其人
前教說宿世一切業緣發露黑惡一切罪事
向諸世尊口自發露既發露已尋時即得諸

佛現前三昧得是三昧已見東方呵閼佛及
妙喜國了了分明如是十方各見諸佛上妙
國土了了分明既見十方佛已夢象頭上有
一金剛人以金剛杵徧擬六根擬六根已普
賢菩薩為於行者說六根清淨懺悔之法如
是懺悔一日至七日以諸佛現前三昧力故
普賢菩薩說法莊嚴力故耳漸漸聞障外聲
眼漸漸見障外事鼻漸漸聞障外香廣說如
妙法華經得是六根清淨已身心歡喜無諸
惡相心純是法與法相應復更得百千萬億

旋陀羅尼復更廣見百千萬億無量諸佛是
諸世尊各伸右手摩行者頭而作是言善哉
善哉行大乘者發大莊嚴心者念大乘者我
等昔日發菩提心時皆亦如汝慇懃不失我
等先世行大乘故今成清淨正徧知身汝今
亦當勤修不懈此大乘典諸佛寶藏十方三
世諸佛眼目出生三世諸如來種持此經者
即持佛身即行佛事當知是人即是諸佛所
使諸佛世尊衣之所覆諸佛如來真實法子
汝行大乘不斷法種汝今諦觀東方諸佛說

是語時行者即見東方一切無量世界地平
如掌無諸埵阜丘陵荆棘瑠璃為地黃金間
廁十方世界亦復如是見是地已即見寶樹
寶樹高妙五千由旬其樹常出黃金白銀七
寶莊嚴樹下自然有寶師子座其師子座
五高二十由旬座上亦出百寶光明如是諸樹
及餘寶座一一寶座皆有百寶光明如是寶
座一一皆有自然五百白象象上皆有普賢
菩薩爾時行者禮諸普賢而作是言我有何
罪但見寶地寶樹及與寶座不見諸佛作是

語已一一座上有一世尊端嚴微妙而坐寶座見諸佛已心大歡喜復更誦習大乘經典大乘力故空中有聲而讚歎言善哉善哉善男子汝行大乘功德因緣能見諸佛今雖得見諸佛世尊而不能見釋迦牟尼佛分身諸佛及多寶佛塔聞空中聲已復勤誦習大乘經典以誦大乘方等經故即於夢中見釋迦牟尼佛與諸大衆在耆闍崛山說法華經演一實義覺已懺悔渴仰欲見合掌胡跪向耆闍崛山而作是言如來世雄常在世間愍念

我故爲我現身作是語已見耆闍崛山七寶莊嚴無數比丘聲聞大衆寶樹行列寶地平正復敷妙寶師子之座釋迦牟尼佛放眉間光其光徧照十方世界復過十方無量世界此光至處十方分身釋迦牟尼佛一時雲集廣說如妙法華經短五一一分身佛身紫金色身量無邊坐師子座百億無量諸大菩薩以爲眷屬一一菩薩行同普賢如此十方無量諸佛菩薩眷屬亦復如是大衆集已見釋迦牟尼佛舉身毛孔放金色光一一光中有百億

化佛諸分身佛放眉間白毫大人相光其光
流入釋迦牟尼佛頂見此相時分身諸佛一
切毛孔出金色光一一光中復有恒河沙微
塵數化佛爾時普賢菩薩復放眉間大人相
光入行者心旣入心已行者自憶過去無數
百千佛所受持讀誦大乘經典自見故身了
了分明如宿命通等無有異豁然大悟得旋
陀羅尼百千萬億諸陀羅尼門從三昧起面
見一切分身諸佛衆寶樹下坐師子座復見
瑠璃地妙蓮華叢從下方空中湧出一一華

間有微塵數菩薩結加趺坐亦見普賢分身
菩薩在彼衆中讚說大乘時諸菩薩異口同
音教於行者清淨六根或有說言汝當念佛
或有說言汝當念法或有說言汝當念僧或
有說言汝當念戒或有說言汝當念施或有
說言汝當念天如此六法是菩提心生菩薩
法汝今應當於諸佛前發露先罪至誠懺悔
於無量世眼根因緣貪著諸色以著色故貪
愛諸塵以愛塵故受女人身世世生處惑著
諸色色壞汝眼爲恩愛奴故色使汝經歷三

界爲此弊使盲無所見今誦大乘方等經典
此經中說十方諸佛色身不滅汝今得見審
實爾不眼根不善傷害汝多隨順我語歸向
諸佛釋迦牟尼佛說汝眼根所有罪咎諸佛
菩薩慧眼法水願與洗除令得清淨作是語
已徧禮十方佛五向釋迦牟尼佛大乘經典復
作是言我今所懺眼根重罪障蔽穢濁盲無
所見願佛大慈哀愍覆護普賢菩薩乘大法
船普度一切十方無量諸菩薩伴唯願慈哀
聽我悔過眼根不善惡業障法如三說五

體投地正念大乘心不忘捨是名懺悔眼根
罪法稱諸佛名燒香散華發大乘意懸繒幡
蓋說眼過患懺悔罪者此人現世見釋迦牟
尼佛及見分身無量諸佛阿僧祇劫不墮惡
道大乘力故大乘願故恒與一切陀羅尼菩
薩共爲眷屬作是念者是爲正念若他念者
名爲邪念是名眼根初境界相淨眼根已復
更誦讀大乘經典晝夜六時胡跪懺悔而作
是言我今云何但見釋迦牟尼佛分身諸佛
不見多寶佛塔全身舍利多寶佛塔恒在不

滅我濁惡眼是故不見作是語已復更懺悔
過七日已多寶佛塔從地湧出釋迦牟尼佛
即以右手開其塔戶見多寶佛入普現色身
三昧一一毛孔流出恒河沙微塵數光明一
一光明有百千萬億化佛此相現時行者歡
喜偈讚繞塔滿七匝已多寶如來出大音聲
讚言法子汝今真實能行大乘隨順普賢眼
根懺悔以是因緣我至汝所為汝證明說是
語已讚言善哉善哉釋迦牟尼佛能說大法
雨大法雨成就濁惡諸衆生等是時行者見

多寶佛塔已復至普賢菩薩所合掌敬禮白
言大師教我懺悔普賢復言汝於多劫耳根
因緣隨逐外聲聞妙音時心生惑著聞惡聲
時起百八種煩惱賊害如此惡耳報得惡事
恒聞惡聲生諸攀緣顛倒聽故當墮惡道邊
地邪見不聞法處汝於今日誦持大乘功德
海藏以是因緣見十方佛多寶佛塔現為汝
證汝應自當說已過惡懺悔諸罪是時行者
聞是語已復更合掌五體投地而作是言正
徧知世尊現為我證方等經典為慈悲生唯

願觀我聽我所說我從多劫乃至今身耳根
因緣聞聲惑著如膠著草聞惡聲時起煩惱
毒處處惑著無暫停時坐此竅聲勞我神識
墜墮三塗今始覺知向諸世尊發露懺悔既
懺悔已見多寶佛放大光明其光金色徧照
東方及十方界無量諸佛身真金色東方空
中作是唱言此佛世尊號曰善德亦有無數
分身諸佛坐寶樹下師子座上結加趺坐是
諸世尊一切皆入普現色身三昧皆作是言
善哉善哉善男子汝今讀誦大乘經典汝所

誦者是佛境界說是語已普賢菩薩復更爲
說懺悔之法汝於前世無量劫中以貪香故
分別諸識處處貪著墮落生死汝今應當觀
大乘因大乘因者諸法實相聞是語已五體
投地復更懺悔既懺悔已當作是語南無釋
迦牟尼佛南無多寶佛塔南無十方釋迦牟
尼分身諸佛作是語已徧禮十方佛南無東
方善德佛及分身諸佛如眼所見一一心禮
香華供養供養畢已胡跪合掌以種種偈讚
歎諸佛既讚歎已說十惡業懺悔諸罪既懺

悔已而作是言我於先世無量劫時貪香味
觸造作衆惡以是因緣無量世來恒受地獄
餓鬼畜生邊地邪見諸不善身如此惡業今
日發露歸向諸佛正法之王說罪懺悔既懺
悔已身心不懈復更讀誦大乘經典大乘法
故空中有聲告言法子汝今應當向十方佛
讚說大乘於諸佛前自說已過諸佛如來是
汝慈父汝當自說舌根所作不善惡業此舌
根者動惡業相妄言綺語惡口兩舌誹謗妄
語讚歎邪見說無益語如是衆多諸雜惡業

闍遘壞亂法說非法如是衆罪今悉懺悔諸
世雄前作是語已五體投地徧禮十方佛合
掌長跪當作是語此舌過患無量無邊諸惡
業刺從舌根出斷正法輪從此舌起如此惡
舌斷功德種於非義中多端強說讚歎邪見
如火益薪猶如猛火傷害衆生如飲毒者無
瘡疣死如此罪報惡邪不善當墮惡道百劫
千劫以妄語故墮大地獄我今歸向南無諸
佛發露黑惡作是念時空中有聲南方有佛
名栴檀德彼佛亦有無量分身一切諸佛皆

經五

十一

說大乘除滅罪惡如此衆罪今向十方無量諸佛大悲世尊發露黑惡誠心懺悔說是語已五體投地復禮諸佛是時諸佛復放光明照行者身令其身心自然歡喜發大慈悲普念一切爾時諸佛廣爲行者說大慈悲及喜捨法亦教愛語修六和敬爾時行者聞此教勅心大歡喜復更誦習終不懈息空中復有微妙音聲作如是言汝今應當身心懺悔身者殺盜淫心者念諸不善造十惡業及五無間猶如猿猴亦如藕膠處處貪著徧至一切

六情根中此六根業枝條華葉悉滿三界二十五有一切生處亦能增長無明老死十二苦事八邪八難無不經歷汝今應當懺悔如是惡不善業爾時行者聞此語已問空中聲我今何處行懺悔法時空中聲即說是語釋迦牟尼名毗盧遮那徧一切處其佛住處名常寂光常波羅蜜所攝成處我波羅蜜所安立處樂波羅蜜滅受想處淨波羅蜜不住身心相處不見有無諸法相處如寂解脫乃至般若波羅蜜是色常住法故如是應當觀十

方佛時十方佛各伸右手摩行者頭作如是
言善哉善哉善男子汝今讀誦大乘經故十
方諸佛說懺悔法菩薩所行不斷結使不住
使海觀心無心從顛倒想起如此想心從妄
想起如空中風無依止處如是法相不生不
沒何者是罪何者是福我心自空罪福無主
短五
一切諸法皆亦如是無住無壞如是懺悔觀
心無心法不住法中諸法解脫滅諦寂靜如
是想者名大懺悔名莊嚴懺悔名無罪相懺
悔名破壞心識懺悔行此懺悔者身心清淨

不住法中猶如流水念念之中得見普賢菩
薩及十方佛時諸世尊以大悲光明爲於行
者說無相法行者聞說第一義空行者聞已
心不驚怖應時即入菩薩正位佛告阿難如
是行者名爲懺悔此懺悔者十方諸佛諸大
菩薩所行悔法佛告阿難佛滅度後佛諸弟
子若有懺悔惡不善業但當讀誦大乘經典
此方等經是諸佛眼諸佛因是得具五眼佛
三種身從方等生是大法印般涅槃海如此
海中能生三種佛清淨身此三種身人天福

田應供中最其有讀誦大方等典當知此人
具佛功德諸惡永滅從佛慧生爾時世尊而
說偈言

若有眼根惡 業障眼不淨 但當誦大乘
思念第一義 是名懺悔眼 盡諸不善業

短五

十三

耳根聞亂聲 壞亂和合義 由是起狂亂
猶如癡獼猴 但當誦大乘 觀法空無相
永盡一切惡 天耳聞十方 鼻根著諸香
隨染起諸觸 如此狂惑鼻 隨染生諸塵
若誦大乘經 觀法如實際 永離諸惡業

後世不復生 舌根起五種 惡口不善業
若欲自調順 應勤修慈心 思法真寂義
無諸分別相 心想如獼猴 無有暫停時
若欲折伏者 當勤誦大乘 念佛大覺身
力無畏所成 身為機關主 如塵隨風轉
六賊遊戲中 自在無罣礙 若欲滅此惡
永離諸塵勞 常處涅槃城 安樂心憺怕
當誦大乘經 念諸菩薩母 無量勝方便
從思實相得 如此等六法 名為六情根
一切業障海 皆從妄想生 若欲懺悔者

端坐念實相 衆罪如霜露 慧日能消除
是故應至心 懺悔六情根

說是偈已佛告阿難汝今持是懺悔六根觀
普賢菩薩法普爲十方諸天世人廣分別說
佛滅度後佛諸弟子若有受持讀誦解說方
等經典應於靜處若在塚間若林樹下若阿
練若處讀誦方等思大乘義念力强故得見
我身及多寶佛塔十方分身無量諸佛普賢
菩薩文殊師利菩薩藥王菩薩藥上菩薩恭
敬法故持諸妙華住立空中讚歎恭敬行持

法者但誦大乘方等經故諸佛菩薩晝夜供
養是持法者佛告阿難我與賢劫諸菩薩等
及十方諸佛因思大乘真實義故除却百萬
億劫阿僧祇數生死之罪因此勝妙懺悔法
故今於十方各得爲佛若欲疾成阿耨多羅
短五
三藐三菩提者若欲現身見十方佛及普賢
菩薩當淨澡浴著淨潔衣燒衆名香在空閑
處應當讀誦大乘經典思大乘義佛告阿難
若有衆生欲觀普賢菩薩者當作是觀作是
觀者是名正觀若他觀者名爲邪觀佛滅度

後佛諸弟子隨順佛語行懺悔者當知是人
行普賢行行普賢行者不見惡相及惡業報
其有衆生晝夜六時禮十方佛誦大乘經思
第一義甚深空法一彈指頃除却百萬億阿
僧祇劫生死之罪行此行者真是佛子從諸
佛生十方諸佛及諸菩薩爲其和尚是名具
足菩薩戒者不須羯磨自然成就應受一切
人天供養爾時行者若欲具足菩薩戒者應
當合掌在空閑處徧禮十方佛懺悔諸罪自
說已過然後靜處白十方佛而作是言諸佛

世尊常住在世我業障故雖信方等見佛不
了今歸依佛唯願釋迦牟尼正徧知世尊爲
我和尚文殊師利具大慧者願以智慧授我
清淨諸菩薩法彌勒菩薩勝大慈日憐愍我
故亦應聽我受菩薩法十方諸佛現爲我證
諸大菩薩各稱其名是勝大士短五覆護衆生助
護我等今日受持方等經典乃至失命墮
地獄受無量苦終不毀謗諸佛正法以是因
緣功德力故今釋迦牟尼佛爲我和尚文殊
師利爲我阿闍黎當來彌勒願授我法十方

諸佛願證知我大德諸菩薩願爲我伴我今
依大乘經甚深妙義歸依佛歸依法歸依僧
如是三說歸依三寶已次當自誓受六重法
受六重法已次當勤修無礙梵行發曠濟心
受八重法立此誓已於空閑處燒衆名香散
華供養一切諸佛及諸菩薩大乘方等而作
是言我於今日發菩提心以此功德普度一
切作是語已復更頂禮一切諸佛及諸菩薩
思方等義一日乃至三七日若出家在家不
須和尚不用諸師不白羯磨受持讀誦大乘

經典力故普賢菩薩勸發行故是十方諸佛
正法眼目因由是法自然成就五分法身戒
定慧解脫解脫知見諸佛如來從此法生於
大乘經得受記別是故智者若聲聞人毀破
三歸五戒及八戒比丘戒比丘尼戒沙彌戒
沙彌尼戒式叉摩尼戒及諸威儀愚癡不善
惡邪心故多犯諸戒及威儀法若欲除滅令
無過患還爲比丘具沙門法者當勤修讀方
等經典思第一義甚深空法今此空慧與心
相應當知此人於一念頃一切罪垢永盡無

餘是名具足沙門法式具諸威儀應受人天一切供養若優婆塞犯諸威儀作不善事不善事者所謂論說佛法過惡論說四眾所犯惡事偷盜姪洩無有慚愧若欲懺悔滅諸罪者當勤讀誦方等經典思第一義若王者大

極五

十六

臣婆羅門居士長者宰官是諸人等貪求無厭作五逆罪謗方等經具十惡業是大惡報應墮惡道過於暴雨必定當墮阿鼻地獄若欲除滅此業障者應生慚愧懺悔諸罪云何名為利利居士懺悔罪法懺悔法者但當正

心不謗三寶不障出家不為梵行人作惡留難應當繫念修六念法亦當供給供養持大乘者不必禮拜應當憶念甚深經法第一義空思是法者是名利利居士修第一懺悔第二懺悔者孝養父母恭敬師長是名修第三懺悔第三懺悔者正法治國不邪枉人民是名修第三懺悔第四懺悔者於六齋日勅諸境內力所及處令行不殺修如此法是名修第四懺悔第五懺悔者但當深信因果信一實道知佛不滅是名修第五懺悔佛告阿難

於未來世若有修習如此懺悔法當知此人
著慚愧服諸佛護助不久當成阿耨多羅三
藐三菩提說是語時十千天子得法眼淨彌
勒菩薩等諸大菩薩及以阿難聞佛所說歡
喜奉行

五五

十七

佛說觀普賢菩薩行法經

音釋

筵延切
篴筠切
筵筵苦切
篴紅切
筵篴樂器
甄甄叔如
迦梵語也此云赤色寶甄居